

Gagliard, professional ed efficient


Flem e Laax cun strategia da marketing nova

DA GIUSEP VENZIN / ANR

■ **La Gruppa Arena Alva ed il hotel Waldhaus Flem sorprendan tuttas activitads da marketing e dil management da products da Flem Laax Falera. Ina nova interpresa FLF (Flem Laax Falera) Management SA – definescha la strategia.** Las treis vischnauncas Flem, Laax Falera, Flem Laax Falera Turissem SA, la Gruppa Arena Alva, l'uniun da commerci e mistregn e l'uniun dils hoteliers han sutscrit il gliendisdis ina cunvegna corrispundera. La nova strategia per la realisaziun dalla DMO (Organisaziun da management dalla destinaziun turistica) Flem Laax ei realisada cun agid dil cantun e cun in expert extern. L'interpresa Flem Laax Falera Turissem SA vegn sliada e la presidenta *Helene Cabalzar* ei sertratga il gliendisdis. Il vicepresidente *Franz Gschwend* surpren il menaschi tochen la fundaziun dalla nova societad cullas treis vischnauncas turisticas sco proprietarias. Ils collaboraturs da Flem Laax Falera Turissem vegnan integrai sche pusseivel ellas novas structuras.

Ina suletta finamira

Daniel Fischer – el ei possessur d'in biro da management e consultaziun el cantun Berna – ha informau il gliendisdis sera en preschientscha dils partenaris dalla DMO Flem Laax dalla nova strategia. El ha buca cuschentau che las lavurs per la realisaziun dalla DMO vegnien dapi onns buca giud via ed ha numnuu ils cunfins da lungatg, da mentalitad, dalla religiun e dil cumin sco motiv. Era las treis vischnauncas cun differentas taxas turisticas e las duas marcas Laax e Flem hagian procurau per tensiun. Quella complexitad hagi procurau per malsegier-



Flem Laax duei daven-
tar en cuort ina destina-
ziun turistica DMO.
Ina cunvegna corri-
spondenta ei vegnida
sutscritta il glien-
disdis vargau. Davos:
Daniel Fischer, mena-
der da project. Ena-
miez: Silvia Casutt,
presidenta communal-
la da Falera; Franz
Gschwend, president
ad interim da Flem
Laax Falera Turissem,
Thomas Ragetti,
president communal
da Flem; Michael
Cafilisch, Uffeci per
economia e turissem.
Davon: Urs Grimm,
directur hotel Flem
Waldhaus, Reto
Gurtner, CEO Gruppa
Arena Alva. FOTO G. VENZIN

ta, disfidonza e scuidonza e bloccau il process. Ils partenaris locals ein vegni informai el decuors dil fenadur ed uost dalle novas structuras. Pauc pli tard han els sutscrit la cunvegna che documentescha tenor il cussegiader da Berna la veglia tier ina suletta finamira – da formar la destinaziun turistica Flem Laax en favur dil hosp.

Model da pionier

Il model da collaboraziun presentaus il gliendisdis ei vegniun numnuu in model da pionier. En quei model formuleschan

las vischnauncas enteifer la nova societad anonima la strategia, la garanzia dalla finanzaziun ed il svilup dalla infrastruttura regiunala – mo era la controlla dils process da lavur. Plinavon definescha la nova societad il contract da prestaziun culla Gruppa Arena Alva ed il Hotel Waldhaus Flem. La societad duei buca daveren in gremi politic. La Gruppa Arena Alva – ella ei gia responsabla pil marketing d'unviern – surpren da niev era il marketing da stad, l'informaziun el liug culs biros turisticas e la realisaziun dils eveniments ed animaziun. Il Hotel

Waldhaus Flem surpren l'organisaziun da congress e meetings en coordinaziun cun auters hotels. Il hotels ed ulteriurs purschiders da prestaziun turisticas ein integrai cun lur meglieras purschidas e la vendita.

Contract per quater onns

El decuors dils proxims tschun meins vulan ils partenaris concretisar ils detagls dalla cunvegna e sutscriver la fin da schaner in contract per ina DMO Flem Laax per quater onns. Cul status da DMO contonscha l'organisaziun

era il sustegn dil cantun. Gia il fevrer proxim ei la partenza dalla lavur operativa.

En ina emprema posiziun han *Thomas Ragetti* e *Silvia Casutt* – ils presidents communs da Flem e da Falera – beneventau las novas structuras che lubeschien in meglie survestsch en favur dils hosps. Per *Reto Gurtner*, il schef dalla Gruppa Arena Alva, ei la nova cunvegna in ulteriur tierm alla tscherca da dapi professionalitad ed efficienza. «Cullas novas structuras evitein nus in tschuet dublettas.»

Enzennas e poesias el Casti Aspermont

Lothar Deplazes e Gion Andrea Casanova han visitau la Pro Sagogn

■ **Dacuort ha giu liug el Casti Aspermont a Sagogn ina sera culturala cun cant, musica e prelecziun. Igl autor Lothar Deplazes, carschius si a Sagogn, e Gion Andrea Casanova, musicist da Laax, han presentau in'ura captivonta sut il tetg dalla casa patriziala.** La tensiun ei stada gronda. Buca la tensiun denter rivals e concurrents. Na, ina tensiun perquei ch'ins havess udiu a curdar ina plemma cura ch'els dus protagonistas ein stai semtgai. Lentschatta ha *Gion Andrea Casanova* fatg. El, il commember dalla Filharmonia dil Grischun, ei in musicist tscherca cul calender plein da termin. Sco fagotist dat el numerus concerts da combra e produziun orchestralas. Ch'el ha semegliant qualitads sco «chansonnier» e pianist savevan buca tuts ch'ei stai alla serenada che la Pro Sagogn ha organisau dacuort. L'uniun porchada adina puspei uettas culturalas als indigens e hosps. Inagada dapli han els astgau guder la hospitalitad dil proprietari dil casti, *Wolfram Kuoni*. Egl anteriur surcombras sesanfla ina sala pintga cun tribuna per concerts specials. E leu han ins giu caschun da tedlar *Gion Andrea Casanova*. All'ala ha el presentau atgnas variaziun musicalas tenor poesias da scribents populars romontschs. Il musicist ha dau in schatg da siu stil che s'accorda zaco cun tal d'in Paolo Conte, in Jacques Brel ni in Constantin Wecker. Igl ei stau interessant d'udir «Allas steilas» dad Alfons Tuor ed «Adumbatten» da Gian Fontana. Ins havess saviu tedlar bia pli gitg quei contrast tier la melodia tradiziunala.

Il cantatur ed il scribent ein sebrat-
tai ella presentaziun. Ina produziun ha

fatg la punt tier l'atra. *Lothar Deplazes*, il scienzaiu ed um dalla historia, ha prelegiu ord sia ovra nova «Termagls dil temps». Il convischin da Sagogn haveva fatg il medem avon otg onns, suenter che siu emprem cudisch «Enzennas dil cunfar» era cumpariu. Lezza gada cun accumpignament dil saxofonist *Clau Maisen*. Quellagada, cun *Gion Andrea Casanova*, ei l'atmosfera puspei stada outra. Sco il cudisch niev. Il historiograf che ha adina stuii setener professionalmein vid materia plitost schetga e formala – purgameinas e documents vegls ch'ei stai da transcriber e describer – ha dau in schatg da sia creativitat litterara. Introducend igl auditori in sia prosa cuorta ha

el accentuau ch'el seigi ius a scola en quei casti, en ina sala nua ch'ei eri ferdaglia. Da lezzas uras haveva la vischnaunca da Sagogn affittau in local dil casti per la scola gronda.

Lothar Deplazes ha denter auter schau udir igl auditori il raquent cuort «Neiv nova». En quel descriva el co il cavriel catschau sfundra staunchels ella neiv. L'uolp che fa leva preda lauda perencuor il Scaffider che ha fatg gl'unviern schi cumadeivels.

Ina punt leutier ha *Gion Andrea Casanova* fatg cun interpretar all'ala sia composiziun «Neiv e neiv, tut la pleiv», la variaziun tier «Unviern» da *Gion Cadieli*. Lu ha *Lothar Deplazes* schau ted-

lar in raquent ironic-sarcastic cul tetel «Leschas». Niessegner haveva baghegiu sur notg en in bellezza liug al ur dil vitg ina casa da vacanzas – senza lubientscha da baghegiar. Las consequenzas han buca schau spitgar gitg.

Strusch in'ura ha il divertiment ell'osa lirica cuzzau. Silsuenter haveva il patrun-casa semtgau ina sorpresa: Ora el curtgin davos il casti han ils hosps astgau guder ina sera da stad ch'ei s'accordada cull'atmosfera si suttetg. Cun in agen vin dil Segneradi e cun buccadas dad apero che *Wolfram Kuoni* haveva schau far aposta per ses hosps indigens ei la sentu-
pada culs dus artists ida a fin.

Augustin Beeli



Gion Andrea Casanova e Lothar Deplazes ein secumpletai cun canzun e poesia. FOTO A. BEELE

Mustér per strategia cun Sedrun ed Andermatt

■ (anr/hh) Il gliendisdis ein representant(a)s dalla vischnaunca e dalle organisaziun turisticas da Mustér sefatschentai dalla structura turistica futura. En quei connex ei vegni decidu unanimamein da cuntinuar cun la collaboraziun cun Sedrun e d'extender quella sin Andermatt. Suenter ch'els partenaris da Sedrun eran gia sedecidi avon per quella via ei la damonda d'ina separaziun dalla destinaziun ussa giud meisa. Alla seduta ein representants dalla vischnaunca, gastronomia e hotellaria, Pencilularas Mustér SA, uniun da commerci e professiun, Scola da skis Mustér e Sedrun Mustér Turissem separticipai. Suenter ch'els arguments pro e contra ina collaboraziun ein vegni discutai ei la decisiun finala vegnida prida. Cumbinada cun quella decisiun ei la posiziun che la structura futura sto esser habla da tener quen da projects surordinai e communabels, mo era dils basegns locals. La decisiun ei vegnida prida cun il scop che la cuntinuaziun dalla collaboraziun, respectivamein l'extensiuin dalla collaboraziun sin Andermatt, gida a contonscher las finamira comunabla per avantatg dall'entira regiun. Consequentamein duei la lavur comunabla da Sedrun e Mustér vegnir cuntinuada cun la finamira da concretisar las structuras novas e da realisar quellas ensem cun Andermatt.

■ ARTG PERSONAL

Gratulaziun a Rabius: Alla Scola aulta da scienzas applicadas turitgesa (ZHAW) a Winterthur ha *Aluis Candinas* da Rabius terminau dacuort il studi da dretg economic cun il «Bachelor of Science ZFH im Wirtschaftsrecht». Cordiala gratulaziun.